

Anpezo à dito de sci!

Candidatura Cortina 2021: ra sènte de 'l paes, ciamada a votà, à respondù polito, con un grun de vote. El sci 'l à vento co 'l 60 parzento, contra el 40. Ades beśen bete aduna el comitato e i domandà i Canpionate del mondo a ra Fis, ignante de 'l prin de maśo. Chi de el no i risponde: stajaron de sguaita



Ra pistes da schie de Tofana, agno che sarae da fei ra gares de i Mondiai 2021. (foto: www.impiantocortina.it/sonia-menardi)

Mondiai 2021 - Ra sènte de Anpezo r'à dito che beśen s'inaante c ora candidatura par vede de ciapà i canpionate de 'l mondo de schie de 'l 2021. A 'l referendum de domegna, ai 12 de aprile, 'l é sù a votà el 44 parzento de i eletore, 2.218 su 5.033. De 1.308, el 59.32%, i à dito de sci; chi outre 897, el 40.68%, i à betù ra crosc su 'l no. Ra sènte r'à dà rajon a chl che 'l ea stà dito e votà in consilio de comun, ai 29 de setembre de 'l an pasà. El capo comun Andrea Franceschi de Matia el me disc:

«No n'è pi nuia da di: ra sènte de Anpezo r'à dito ra soa, i nostre zitadis i crede a chel che suzede ancuoi e a chel che se fesc par el doman de 'l nosc paes. Ades beśen se sentreà, parecià el comitato, agnó che 'l é inze el Governo talian, ra Rejon Veneto, ra Provincia de Belun, el nosc comun, par lourà aduna e ciapà chiste Mondiai de 'l 2021».

Su 'l voto el sònta pede: «Ra parsones de Anpezo 's à votà de un grun, pi de chel che se se spetaa. I m'ha dito de s'inaante, de no zede, dapò de chel che m'è stà fato 'l an pasà, de sùgno, a Barcelona. Coscita s'ì à anche respondù a chi che dijea che chesto referendum 'l ea contra el laoro fato da 'l nosc comun».

Par el grupo pi pizo 'l é Stefano Ghezze Ghezo a di ra soa: «El referendum el me disc de s'inaante,

senza festide, par ciapà i canpionate de 'l 2021. Chesto 'l é un valor che se sònta pede a 'l laoro fato fin ades. Ra sènte r'à capì che chesta manifestazion ra podarà dià el paes de Anpezo e duta ra provincia de Belun. De chi che à votà, pi che see i à vorù el sci, ma tropa sènte ra no n'è sùda: tropa parsones pensaa che fose asei chel che aea dito el consilio de comun, 'l an pasà de outon, de setembre. Da ca innaante el comun 'l arà da contà polito, par firo e par segno, ce che se fesc. I Mondiai i dajarà 'na prenta innaante a Anpezo, ves el so doman, con voia de fei, par el turismo, par ra economia. Sarà un vantaśo par dute».

Enrico Valle de Moris, presidente de el comitato de Cortina 2019 e de ra asociazion par ra Copa del mondo de schie: «On tardia par zinche mesc, a spetà chesto referendum: se podea i dorà polito, par ra candidatura. Ades beśen se sentreà. Ra Copa del mondo ra fajarà duto chel che rap ó, e ra sà fei, par portà innaante el projeto. Par el voto, m'ei fato de mereea: 'l é stà pi no de chel che cardee».

Par el sci, 'l à lourà Enrico Ghezze Ghezo, de i inpiante: «Ades se volta pajina, ades 'l é da s'ì dute de 'l medemo ver. R'à vento ra Cortina de chi che à voia de lourà, de fei, de ciapà inze. Inveze à pardù chi che v'ha a stroze, drio el laoro de chi outre. Ades basta radeghe e cridore:

fajon saé a ra Federazion de i schie Fis che son dute aduna, par voré chesta gares. No s'outre ón biśoin de chesta manifestazion, par descedà fora el paes, par el comedà».

Da 'l comitato par el referendum, ra soena presidente Valentina Zardini de Zardin ra disc: «Ades 'l é da fei duto el meo che se pó, par i ciapà, chiste Mondiai 2021. Speron che el comitato el laore polito e che se era ota bona. A votà 'l é sù un grun de sènte: vó di che inze 'l paes ra sènte r'aea voia de di ra soa; no n'è stà fato duto par deban, cemodo che à dito calchedun. Se spetaon che ra s'ise coscita, che venzese el sci. Ades beśen lourà polito, par bete a s'ì na bona candidatura».

Par el no, 'l ea Roberta de Zanna Bianco, che ra disc: «Se spetaon che venzese el sci: i ea pi fortes, de un grun. Ma chi 897 vote i me disc che no n'ha votà par el no solo chi alcuante ambientalistes, o chi che i é senpre contra, a duto. Tropa sènte de Anpezo r'ha dito de no parsuaśa. Ades chiste i no n'ha negun che fesc senti ra so vosc, in comun. No s'outre stajaron de sguaita, i tendaron, vardaron drio, ce che i fajarà chi de el comitato. E speron che i me feje saé algo, de chel che i fesc, no cemodo che 'l é stà fin ancuoi: chi de el sci i cardea de fei duto chel che i vorea, senza fei saé nuia».

Marco Dibona Moro